

# Prigaria à u Populu Corsu

Sò Corsica Regina nigata è messa in croce.  
I mo figlioli anch'elli mi danu la ferita.  
Induv'hè mossu lu fiatu chì mi purtava arritta ?  
Piengu d'un esse più.

Sò a mamma chì u figliolu ùn tene cara.  
Sò turnata prufittu, rendite mi l'onore,  
Ùn girate lu capu, o Corsi ùn vogliu more !  
More d'un esse più.

Di lacrime nucente si n'hè corsu lu fiume.  
Fiumara corre à strughje lu solcu di speranza,  
Mi tomba lu smintecu, mi tomba la partenza.  
Straziu d'un esse più.

È di l'anima meia chì ne firmerà ?  
Lu me fustu sigatu eppò tronche le rame.  
Pietà figlioli mei, fate cresce le brame,  
Vogliu sperà dinù !

Siate l'acque pè spenghje lu focu chì mi rode  
Innacquate lu core di vostra terra corsa,  
Alzate bianca è nera è mughjate cun forza  
« populu ci hè dinù ! »  
« populu ci hè dinù ! »